

UNIVERZITET U NOVOM PAZARU

Senat Univerziteta

Broj:1954/25/VI-3

Novi Pazar, 27.11.2025. godine

Na osnovu člana 46. Statuta Univerziteta u Novom Pazaru, Senat Univerziteta, na sjednici održanoj dana 27.11.2025. godine, donio je –

PRAVILNIK O RADU STUDENTSKIH KLUBOVA NA UNIVERZITETU U NOVOM PAZARU

I. OPĆE ODREDBE

Predmet i definicija

Član 1.

(1) Ovim Pravilnikom uređuju se uslovi, pravila i procedure za osnivanje, organizaciju, upravljanje i funkcioniranje studentskih klubova na Univerzitetu u Novom Pazaru (u daljem tekstu: Univerzitet).

(2) Pravilnik ima za cilj osigurati da studentski klubovi djeluju u skladu sa vrijednostima, misijom i Statutom Univerziteta, promovirajući akademski razvoj, društvenu odgovornost, kulturološku raznolikost i vannastavni angažman studenata.

(3) Studentski klub je dobrovoljna grupa studenata Univerziteta koja ima za cilj okupljanje studenata koji dijele zajedničke interese, naučne, stručne, sportske ili umjetničke sklonosti.

Zabrana političkog djelovanja

Član 2.

(1) Na Univerzitetu, kao i u okviru rada studentskih klubova, strogo je zabranjeno političko organiziranje i djelovanje.

(2) Nije dozvoljeno korištenje imena, prostorija ili resursa kluba za promociju političkih stranaka, održavanje političkih skupova ili aktivnosti koje imaju političke ili stranačke ciljeve.

(3) Rukovodioci kluba (predsjednik, potpredsjednik, sekretar) ne mogu obavljati istaknute funkcije u političkim strankama za vrijeme trajanja mandata u klubu.

Ravnopravnost i zabrana diskriminacije

Član 3.

(1) Klubovi su dužni da u svom radu osiguraju ravnopravnost i inkluzivnost.

(2) Zabranjen je svaki vid diskriminacije zasnovan na rasi, vjeri, etničkoj pripadnosti, polu, socijalnom porijeklu ili bilo kojem drugom ličnom svojstvu.

II. OSNIVANJE KLUBA

Procedura osnivanja

Član 4.

(1) Klub može osnovati grupa od najmanje 5 (pet) aktivnih studenata Univerziteta koji dijele zajednički interes.

(2) Procedura osnivanja započinje podnošenjem Zahtjeva za registraciju kluba (Prilog 1) koji se podnosi Pravnoj službi (u daljem tekstu: Nadležna služba) ili Studentskom parlamentu.

(3) Zahtjev mora sadržati: naziv kluba, imena i potpise osnivača, ime predloženog predsjednika, ime mentora (iz reda nastavnog osoblja), te kratak opis ciljeva i planiranih aktivnosti.

(4) Odluku o odobravanju osnivanja kluba donosi Rektor Univerziteta na prijedlog Nadležne službe, u roku od 7 radnih dana od prijema urednog zahtjeva.

(5) Odluka o osnivanju može biti negativna ukoliko su ciljevi kluba u suprotnosti sa Statutom Univerziteta, etičkim kodeksom ili ukoliko već postoji klub sa istim ciljevima i aktivnostima.

Oblast djelovanja

Član 5.

(1) Klubovi se mogu baviti aktivnostima koje doprinose profesionalnom, akademskom i ličnom razvoju studenata, uključujući ali ne ograničavajući se na: nauku, kulturu, umjetnost, sport, humanitarni rad, ekologiju, debatu i inovacije.

(2) Zabranjeno je osnivanje klubova koji za isključivi cilj imaju promociju partikularnih interesa koji nisu u skladu sa akademskim duhom ili koji narušavaju ugled Univerziteta.

III. ORGANIZACIJA, PRAVA I OBAVEZE KLUBA

Članstvo i rukovođenje

Član 6.

(1) Član kluba može biti svaki student Univerziteta u Novom Pazaru.

(2) Svaki klub mora imati Predsjednika kojeg biraju članovi kluba. Predsjednik je odgovoran za zakonitost rada kluba i komunikaciju sa organima Univerziteta.

(3) Jedan student može obavljati rukovodeću funkciju (predsjednik) samo u jednom studentskom klubu istovremeno.

Prava klubova

Član 7.

Klubovi imaju pravo na:

1. Korištenje prostorija Univerziteta za održavanje sastanaka i aktivnosti, uz prethodnu najavu i odobrenje.
2. Promociju aktivnosti putem oglasnih tabli i zvaničnih kanala komunikacije Univerziteta (internet stranica, društvenih mreža), uz saglasnost PR službe.
3. Upotrebu naziva "Univerzitet u Novom Pazaru" ili skraćenice "UNP" isključivo u kontekstu naziva kluba (npr. "Debatni klub UNP"), uz odobrenje Rektora.
4. Finansijsku podršku za projekte od posebnog značaja, u skladu sa raspoloživim budžetom.

Obaveze klubova

Član 8.

Klubovi su obavezni da:

1. Poštuju Statut i pravila Univerziteta.
2. Usvoje Statut kluba kojim se definiraju ciljevi i način rada.
3. Na početku svake akademske godine dostave Plan rada za tu godinu.
4. Realiziraju najmanje jednu aktivnost u toku semestra kako bi zadržali status aktivnog kluba.
5. Podnose izvještaj o radu i realiziranim aktivnostima Nadležnoj službi na kraju svakog semestra.
6. Vode urednu evidenciju o članstvu i finansijama.

Finansiranje

Član 9.

(1) Klubovi se mogu finansirati iz:

- Sredstava Studentskog parlamenta;
- Budžeta Univerziteta namijenjenog za studentske aktivnosti (po odobrenom projektu);
- Sponzorstava i donacija, uz prethodno odobrenje Univerziteta;
- Članarina, ukoliko je to predviđeno statutom kluba.

(2) Sva prikupljena i utrošena sredstva moraju biti transparentna i opravdana odgovarajućom dokumentacijom (računima).

Prestanak rada kluba

Član 10.

(1) Studentski klub prestaje sa radom:

1. Odlukom članova kluba: Ako članovi kluba natpolovičnom većinom donesu odluku o raspuštanju kluba;
2. Smanjenjem broja članova: Ako broj aktivnih članova kluba padne ispod minimalnog broja od 5 (pet) studenata propisanog ovim Pravilnikom;
3. Neaktivnošću:
 - Ukoliko klub ne realizira niti jednu aktivnost u toku jednog semestra;
 - Ukoliko ne podnese izvještaj o radu u propisanom roku.
4. Odlukom Rektora:
 - Ukoliko se utvrdi da klub djeluje suprotno Statutu Univerziteta, etičkom kodeksu ili odredbama ovog Pravilnika;
 - Ukoliko se utvrdi da klub sprovodi političko organizovanje ili djelovanje unutar Univerziteta;
 - Ukoliko klub svojim djelovanjem narušava ugled Univerziteta;
 - Ukoliko klub nenamjenski troši dodijeljena finansijska sredstva.

(2) Rješenje o brisanju kluba donosi Pravna služba, po službenoj dužnosti ili na osnovu odluke Rektora.

(3) U slučaju prestanka rada kluba, sva imovina i preostala finansijska sredstva kluba koja su dobijena od Univerziteta vraćaju se Studentskom parlamentu ili Univerzitetu.

IV. MENTORSTVO I KOORDINACIJA

Koordinacija rada

Član 11.

(1) Za koordinaciju rada studentskih klubova zadužena je Kancelarija generalnog menadžera u saradnji sa Studentskim parlamentom.

(2) Nadležna služba vodi Registar studentskih klubova i pruža pravnu podršku.

Mentor kluba

Član 12.

(1) Svaki klub mora imati Mentora iz reda akademskog (profesori, asistenti) ili administrativnog osoblja Univerziteta.

(2) Mentor savjetuje studente, pomaže u planiranju aktivnosti i osigurava da rad kluba bude u skladu sa akademskim standardima.

(3) Mentor nema pravo glasa u donošenju odluka unutar organa kluba, ali ima pravo veta na aktivnosti koje mogu narušiti ugled Univerziteta.

Stupanje na snagu

Član 13.

Ovaj Pravilnik stupa na snagu 8 (osam) dana od dana objavljivanja na oglasnoj tabli i internet stranici Univerziteta.